

02 我愛食的四秀仔

陳素貞

市面上的四秀仔百百款，毋過佇我心目中上蓋好食的干焦一款，彼就是阮兜家己做的雞卵糕。

會記得細漢的時陣，日時仔阿爸、阿母無閒咧上班，我就佇阿公、阿媽身軀邊綴前綴後，袂輸樹奶糖按呢黏過來、黏過去。個對我這粒糖霜丸是惜命命，逐工的四秀仔毋是餅仔就是雞卵糕，頂懸閣有我上愛的尪仔，這是阿公專工為我這個古錐的查某孫做的喔！

阿公開一間餅店，有賣麩、大餅，嘛有咧賣雞卵糕。便若下晡時仔麩出爐的時陣，規條街仔路會當講是芳貢貢閣貢貢芳！死忠的人客來遮買，攏是一袋一袋紮轉去，閣會食好鬥相報。

自細漢看著阿公對原料選擇的堅持恰製作過程的用心，知影做代誌就是愛腳踏實地、用心才做會出好的成果。我嘛學著伊做代誌認真的態度，恰一寡仔做雞卵糕的鉸角。

國校三年仔開始，我上期待的就是逐禮拜的歇暎日，彼工阿公會恰我同齊做雞卵糕。歇暎日阿公無開店，我就趁這個時陣綴伊學師仔。對秤麵粉、敲卵、共烘箱烘予燒，沓沓滴滴的工課有夠濟，逐項攏愛真斟酌，芳貢貢閣好食的雞卵糕才做會出來。

經過這三冬的練習，自烘甲臭火焦，到這馬人干焦鼻著就會喙瀾涵涵津，我做的雞卵糕會當搭胸坎掛保證，絕對袂輸外口人咧賣的喔！阿媽共我講若是欲食好食的雞卵糕，著愛用心做、綿精學，才會出師！

頂禮拜老師出一個作業，就是愛阮先佇厝裡做一項家己上熟手的好食物，才閣提來學校恰逐家分享，我頭一個想著的就是做雞卵糕。會記得彼一工，食過雞卵糕的同學，逐家攏呵咾甲會觸舌，閣一直問我愛按怎做。聽著逐家對我家己做的雞卵糕遮爾仔肯定，閣看著個食甲遐爾仔歡喜，我比個閣較歡喜。

想袂到我做的四秀仔，逐家遮爾仔捧場。我決定矣！後擺我嘛欲開一間好食的雞卵糕店，和人分享我愛食的四秀仔！